



IV GOVERNO CONSTITUCIONAL SEKRETARIA ESTADU KONSELLU MINISTRUS

KOMUNIKADU IMPRENSA

Soru-mutu Konsellu Ministrus iha loron 03 fulan Feveiru tinan 2010

Konsellu Ministrus hala'o soru-mutu iha loron Kuarta ne'e, loron 03 fulan Feveiru tinan 2010, iha sala Soru-Mutu Konsellu Ministrus nian, iha Palásiu Governu, iha Dili, no halo aprovasaun ba:

1. Dekretu Lei ne'ebé regula Emisaun ba Vistu

Dekretu Lei ida ne'e, ne'ebé hetan aprovasaun ho koresaun, atu limita sirkunstánsia sira iha ne'ebé estranjeiru ida bele rekere emisaun vistu vizita nian ka trázitu nian, bainhira to'o ba iha Timor-Leste.

Iha postu sira fronteira terrestre nian, sidadaun Indonézia nian sira de'it mak bele husu Vistu Vizita nian ka Vistu Trázitu nian, pasajeiru sira seluk hotu-hotu ne'ebé husu atu tama iha Timor-Leste, tenke hetan Vistu préviu ida molok to'o iha postu fronteira nian. Iha Aeroportu no Portu Internasionál sira vizitante estranjeiru sira no pasajeiru iha trázitu nia laran, portadór sira ho pasaporte ne'ebé emite husi país ne'ebé hetan ona autorizasaun, bainhira to'o iha Timor-Leste, bele husu Vistu Vizita nian ka Vistu trázitu nian. Aprovasaun ba Diploma Legál ida ne'e halo haree ba faktu katak importante atu ezerse kontrolu ida ne'ebé efetivu kona-ba prezensa no permanénsia estranjeiru sira nian iha País, tanba ne'e, ohin loron, estranjeiru hotu-hotu bele husu Vistu ida ba vizita ka trázitu, bainhira to'o iha Timor-Leste.

Maske nune'e, presiza atu hatene katak, pasajeiru sira ne'ebé mai hosi país oioin apresenta nível risku nian no inkumprimentu rekizitu sira emigrasaun nian ne'ebé la hanesan. Bainhira hala'o, desizaun ida kona-ba emisaun vistu nian ida bainhira to'o iha portu fronteira nian, la posivel hela de'it atu ezamina sirkunstánsia hotu-hotu ho risku boot husi pasajeiru sira. Rekerimentu sira ne'ebé sidadaun sira fo molok sira halo viajén mai Timor-Leste tenke konta didi'ak, no sei iha tempu disponivel atu rekere informasaun adisionál, bainhira de'it presiza, atu fundamenta di'ak liu desizaun vistu nian.

2. Rezolusaun ne'ebé Aprova Rejistu Saúde Familiár

Rejistu Saúde Familiár sei permite Ministériu Saúde atu adota oficialmente prosedimentu rejistu nian kona-ba dados saúde membru familiár ba iha nível Aldeia no Suku sira. Iha prátika, ida ne'e temi kona-ba feramenta ida ne'ebé permite atu hetan indikadór saúde nian sira no dertermina perfil sanitáriu País nian atu bele dezenvolve medidas ne'ebé presiza atu promove di'ak liután prevensaun saúde nian.

Dados sira ne'ebé Sistema Informasaun Saúde nian oficialmente uza atu fó sai perfil saúde populasau nian sei kontinua refere deit ba estimativa Sensus no la koresponde ba realidade atuál ne'ebé profesionál sira saude nian identifika. Ho medida ida ne'e, Ministériu Saúde hakarak hetan dados lolós kona-ba saúde, iha Timor-Leste, ne'ebé sei sai nu'udar baze atu determina indikadór sira no trasa meta lolós hodi atinje no rekolla informasaun, hanesan: número membru familiár no faixa etária hirak ne'ebé kompoin família ida, kondisaun hela-fatin no distánsia husi postu sentru saúde ne'ebé besik liu, moras hirak ne'ebé mosu maka'as liu no tipu assisténsia ka akompañamentu médiku ne'ebé presiza akompaña ba família ida-ida, no seluk-seluk tan.

3. Dekretu-Lei ne'ebé aprova Lei-oan Komisaun Akompañemntu Prosesu Aprovizionamentu no Sekretariadu Tékniku Aprovizionamentu nian.

Komisaun Akompañamentu Prosesu Aprovizionamentu no Sekretariadu Tékniku Aprovizionamentu hamriik iha sekuénsia atu halo desentralizasaun prosedimentu aprovizionamentu nian no kria atu alkansa prestasaun servisu ida ne'ebé di'ak-liu atu bele hetan efikásia no transparánsia ida ne'ebé adequada ne'ebé prosesu aprovizionamentu Estadu nian ida tenke halo tuir.

Nune'e, Komisaun Akompañamentu Prosesu Aprovizionamentu sei sai, liuliu, hanesan servisu ne'ebé kaer responsabilidade atu fiskaliza no akompaña prosesu aprovizionamentu no ezekusaun projetu sira no avaliaun finál ba rezultadu sira, enkuantu Sekretariadu Tékniku Aprovizionamentu ninia misaun mak realiza prosesu aprovizionamentu ba projetu sira ho valór dolar amerikanu millaun ida ba leten, hanesan mós akompaña no fó assisténsia téknika ba prosedimentu sira seluk ne'ebé entidade públika sira realiza.

4. Rekolla raan.

Konsellu Ministrus hasai mós desizaun, katak, iha loron Sesta, loron 12 fulan FEVEREIRU, funsionáriu públiku sei la hala'o atividade limpeza nian hanesan baibain, maibé tenke bá sira nia servisu fatin hodi mantein iha ne'ebá.

Ministériu Saúde sei realiza kampaña ida kona-ba rekolla raan, iha loron ne'e, ekipa médika sira sei dezloka ba servisu públiku sira hotu atu rekolla raan, ba ida ne'e Governu husu ba funsionáriu hotu-hotu atu iha disponibilidade hodi fó sira nian raan, haree tuir nesiedade ospital nian, ho hanoin katak loron ida ita ida-ida sei presija raan ne'e.

Atividade limpeza sei hala'o fila-fali iha loron Sesta tuir mai, loron 19 fulan Feveiru.